

**Ilagiinni atorfinitsitsisarnerit pillugit Inatsisartut peqqussutaata allangortinneqarneranik Inatsisartut peqqussutissaattut siunnersuummut nassuiaatit.**

**Nalinginnaasumik nassuiaatit:**

Inatsisartut 2001-imi upernaakkut ataatsimiinneranni Ilagiinni atorfinitsitsisarnerit pillugit Inatsisartut peqqussutaata allangortinneqarnissaanut Inatsisartunut ilaasortap Aasi Narup Chemnitzip aalajangiiffigisassatut siunnersuut saqqummiussaa akuersissutigineqarpoq (oqaluuserisassani imm. 91). Akuersissuteqarneq pivoq Inatsisartut Kultureqarnermut Ilinniartitaanermullu Ataatsimiititaliaannit tamanna pillugu isumaliutissiisummi isumaqatigiissimaneq tun-ngavigalugu.

Siunnersuutip akuersissutigineqarnerani Naalakkersuisut peqquneqarput Ilagiinni atorfinitsitsisarnerit pillugit Inatsisartut peqqussutaata allangortinneqarnissaanut siunnersuuteqartup tamatumunnga siunnersuutaa naapertorlugu siunnersuutininik saqqummiusseqqullugit. Naalakkersuisut taamaalillutik peqqussummik allangortitsinissaminnut peqquneqarput, taamaalillutillu provsteqarfimmi ilagiit sinniisaat ilaasortassatut qinigaasimasut provstitut atorfinitsitsinerumt atatillugu oqaaseqaateqarsinnaatitaallissallutik. Peqqussut atuuttoq naapertorlugu palaseqarfimmi provstip palasiuffigisassaani ilagiit sinniisaannut ilaasortassatut qinigaasimasut kisimik oqaaseqaateqartussaapput.

Matumuuna siunnersuut saqqummiunneqartoq aalajangiiffigisassatut siunnersuutip imaa naapertorlugu suliarineqarpoq.

Inatsisartut Kultureqarnermut Ilinniartitaanermullu Ataatsimiititaliaata isumaliutissiisummi siunnersuummut tunngavissatut oqaatigaa provsteqarfimmi ataatsimi ilagiit sinniisaat attuumassuteqartut tamarmik qinnuteqartut sorliit provstitut piukkunnerlugit assigiimmik oqaaseqaateqarsinnaasariaqartut, tassami taakkua tamarmik provstimit sullinneqarmata. Ataatsimiititaliattaq oqaatigaa siunnersuutip siullermeerneqarnerani biskoppi provsteqarfinnilu ataatsimiititaliat tusarniaavigineqartut, tamatumani takuneqarsinnaasoq provsteqarfinni ataatsimiititaliat siunnersuummut tapersersuisut, biskoppili akerliulluni.

*Tusarniaaneq:*

Siunnersuut biskoppimut, provsteqarfinni ataatsimiititalianut, Palasit Peqatigiiffiannut kiisalu Kirkeministeriamut tusarniaassutigineqarpoq.

Biskoppi akissuteqaammini oqarpoq peqqussutip allannguutissaatut siunnersuut isumaqatigisinnaanagu, pissutigalugu eqqarsaatigilluagaasutut isumatusaarnerusutulluunniit isumaqarfigin-nginnamiuk. Tamatumunnga atatillugu Inatsisartut aalajangiiffigisassatut siunnersuummik qulaani taaneqartumik oqallisiginninnissaannut atatillugu oqaaseqaatini saqqummiussani tassunga tunngasut innersuussutigai. Biskoppip aammattaaq oqaatigaa provstinik atorfinitsitsinermut atatillugu ilagiit sinniisaasa tamarmik illuatungiliuttutut tusarniaavigineqartassanersut kissaatigineqassappat, isumaqatigisinnaallugu palaseqarfimmi provstip palasiuffigisassaani taamaallaat ilagiit sinniisaannik ataatsimeeqatigiissitsisoqartassappat. Tamatumunnga patsisigaa taamatut pisoqanngippat tamanna akisoorujussuussammat aammalu naapertuilluarnrunani "provsteqarfimmi ilagiit sinniisaat" palaseqarfimmi provstip aammattaaq palasitut suliffigisassaani ilagiit sinniisaannut naligitinneqassappata. Ingerlaqqillunilu innersuussutigaa palaseqarfimmiit provstip palasiuffigisaaniit oqaaseqaatit palaseqarfinni allani provstip taamaallaat provstitut suliffigisaani ilagiit sinniisaannit oqaaseqaatinut sanilliullugit qanoq iliorluni naliliivigineqassanersut eqqarsaatigineqartariaqartoq.

Inatsisartut peqqussutip allanngortinnissaanut siunnersuummut biskoppip akerliunera aalaja-ngiiffigisassatut siunnersuutip akuersissutigineratigut nalunngimmassuk siunnersuut Inatsisartut siusinnerusukkat aalajangiinerat naapertorlugu aalajangiusimaneqarpoq. Oqaaseqaatit naliliivigineqartarsinnaanerat eqqarsaatigalugu oqaatigineqassaaq Naalakkersuisut malittarisassanik tamatumunnga tunngasunik aalajangersaanissartik siunertarinngimmassuk. Taamaallaat pineqarput oqaaseqaatit pineqaratillu taasinissaq qinersinissarlunniit, taamaattumillu Naalakkersuisut provstinik atorfinitsitsinermi oqaaseqaatit assigiinngitsumik naliliiffigisinnaallugit. Palaseqarfimmiit provstip aammattaaq palasitut suliffigisaaniit oqaaseqaat tamatumunnga atatillugu pissusissamisoortumik immikkut naliliivigineqassaaq.

Kirkeministeriap tusarniaanermut akissuteqaammini Danmarkimi provstinik atorfinitsitsisarnermi periaaseq kiisalu provstimik toqqaasarnermi provsteqarfimmi provstissamik ilagiit sinniisaasa provsteqarfimmi palasit akornanni toqqaanissaminnut periarfissaqarnissaat nassuiaateqarfigai. Ministereqarfiup oqaatigaa periaaseq taamaattoq ministereqarfimminngaanniit biskoppinilluunniit tapersorsorneqanngitsoq. Ministereqarfiup oqaatigaa tamatumunnga tunngaviummat provstit suliarisartagaat pingaarnerusumik tassaammata provsti biskoppi sinnerlugu palasinik nakkutiginnittuussasoq aammalu provsti provsteqarfimmi ataatsimiititaliamut ingerlatsisussatut ilaasortaasoq. Tassa imaappoq provsteqarfimmi ilagiit sinniisaat taamaallaat provstissamik toqqaanermi killilimmik peqataasinnaasut. Oqaatigineqarportaaq biskoppimik toqqaasarneq eqqaassanngikkaanni ileqqunngitsoq atorfiit atorfeqartup siulersuinermik suliassaqarfimmik isumaginniffii qinersinermi periaaseq atorlugu inuttalerneqartarnerat. Kirkeministerip provstinik toqqaasarnera pillugu aalajangersakkat atatinneqarput palasit piukkunnaateqarluartut provstitut atorfimmut atasumik siulersuinikkut teknikkikkullu suliassanik immikkut ittunik isumaginnissinnaasutut isumaqarfigineqartut toqqaarneqarnissaat eqqarsaatigalugu. Kirkeministeriap naggataagut oqaatigaa allannguutissatut siunnersuutigineqartoq

kinguneqassasoq kia palaseqarfimmi palasiunissaanut ilagiit sinniisaasa sunniuteqarfigisassa at assut ajorseriassasut, tassami provsteqarfimmi ilagiit sinniisaasa tamarmik oqaaseqaataat aalajangernissamut tunngaviusassammat.

Kirkeministeriap oqaaseqaatai ataatsimut isigalugit biskoppimit tusarniaanermut akissuteqaammi oqaaseqaatinut tunngasut innersuussutigineqassapput. Matumunnga ilassutitut oqaatigineqassaaq Naalakkersuisut isumaqanngimmata siunnersuut ilagiit sinniisaata ilagiilluunniit sinniisaasa sunniuteqarnissaannut pitsaanginnerulersitsissasoq palasitut atorfiup provstip palasiuffiutigisassaata inuttalernissaani, tassami tamatumani taasinissaq qinersinissarlunniit pineqanngimmata taamaallaalli oqaaseqaateqarnissaq pineqarluni. Aammattaaq oqaaseqaatit naliliivigineqarnissaat pillugu oqaaseqaatit qulaaniittut takoqquneqassapput.

Avannaata Provsteqarfiani Ataatsimiititaliaq tusarniaanermut akissuteqaammini siunnersuuteqarpoq provsteqarfiup provsteqarfimmi ataatsimiititaliaanut ilaasortassatut qinigaasimasut tamatumunnga taarsiullugu oqaaseqaateqarsinnaasariaqartut. Siunnersuutigineqartoq Inatsisartut siusinnerusukkut aalajangernerannut naleqqiullugu annertuumik allangortitsimmat siunnersuutigineqartq akuersaarneqarsinnaasimanngilaq.

Tusarniaanerup naammasinerani tusaniaavigineqartut allat tutsiussimanngillat.

*Allaffissornikkut aningaasaqarnikkullu kingunerisassai:*

Siunnersuutip akuersissutigineqarnera kinguneqassaaq provsteqarfimmi palaseqarfinni ataasiakkaani ilagiit sinniisissaattut qinigaasimasut provstitut atorfiit inuttalerneqarnissaannut inassuteqaateqartalissammata, tamatumaniissaaq domsprovstitut atorfik ilanngullugu.

Malittarisassanut atuuttunut assigiinngissutitut § 10-mi imm. 1-imi peqqussummi §§ 6-imi 7-imilu periaasissaaq innersuunneqanngilaq. Tamanna isumaqarpoq oqaaseqaateqartarnissamut periaasissaaq tamatumunnga taarsiullugu § 10-mi, imm. 4 naapertorlugu Naalakkersuisunit aalajangersarneqassammat. §§ 6-imut 7-imullu innersuussinerup peerneqarneranut pissutaavoq taama pisoqassappat tamatuma angalanermut aningaasartuutit akilerneqarnissaannut aningaasartuutaanerulersussat amerleriangaatsiarnissaat nassatarissamagu (provsteqarfimmiit provsteqarfimmut nikerartumik), provsteqarfimmit ilagiit sinniisaannut ilaasortassatut qinigaasimasunut tamanut ataatsimeeqatigiitsitsisoqartassappat. Aningaasartuutaanerulersussat taamatut ataatsimeeqatigiittarnissap iluaqutigineqarsinnaaneranut nallersuussinnaangitsutut isumaqarfigineqarput.

Naalakkersuisut tamatumunnga taarsiullugu imm. 4-mi piginnaatitsinissamut aalajangersagaq naapertorlugu malittarisassanik aalajangersaanissartik siunertaraat, tassa palaseqarfimmi, provstip palasiuffigisaani ilagiit sinniisaannut ilaasortassatut qinigaasimasunut biskoppip ataatsi-meeqatigiitsitsisarnera ingerlaannassasoq, tassami taakkua provstimik inuttaliinermi oqartussaaqataanermik saniatigut palasip

atorfianik inuttaliinermi immikkut sunniuteqaqataanissaminnik pisariaqartitsimmata. Provsteqarfimmi ilagiit sinniisaannut ilaasortat allat eqqarsaatigalugit taakkua soqutigisaat taamaallaat provstitut atorfeqarnermut kattunneqarsinnaapput. Ilaasortat taakkua ilagiit sinniisai tamaasa ataasiakkaarlugit oqaaseqaatissaminnik allaganngorlugit tunniussivigisarnissaat pillugu Naalakkersuisut malittarisassanik aalajangersaanissartik siunertaraat. Siunnersuutigineqarpoq ilagiit sinniisaannit tamarmiusunit oqaaseqaatissat ullumikkutut biskoppi aqutigalugu biskoppillu nammineq oqaaseqaataa ilanngullugu nassiunneqartassasut.

Taamatut periaaseqarnerup nassatarissavaa peqqussutissap akuersissutigineqarnera aningaasaqarnikkut kinguneqarnavianngitsoq aammalu allaffissornikkut imatorsuaq kinguneqarnaviarani.

### **Siunnersuummi aalajangersakkanut ataasiakkaanut nassuiaatit:**

#### *§ 1-imut*

Aalajangersakkakkut provstinik, tamatumanissaaq domsprovstimik atorfinitsitsisarnermi periaaserineqartoq allannngortinneqassaaq imaalillugu, provsteqarfiup palaseqarfiini tamaginni ilagiit sinniisaannut qinigaasimasut provstitut atorfimmuut qinnuteqarsimasut pillugit oqaaseqaateqassallutik.

Periaasissaaq pillugu siunnersuutip allaffissornikkut kingunerisassai pillugit nalinginnaasumik nassuiaatit takoqquneqarput.

#### *§ 2-mut*

Piffissaaq atortuulersitsiviusoq aalajangiunneqarpoq allannguutip sapinngisamik piaarnerpaamik atortuulersinneqarnissaa siunertaralugu. Peqqussutissatut siunnersuutip allannguutaata akuersissutigineqarneratigut provstinik atorfinitsitsinissani 1. juli 2002-p kingornatigut pisussani periaatsit nutaat taamaalillutik malittarineqassapput.